



2018 оны 09 дүгээр сарын 14  
№34 /1039/

# ТӨРИЙН МЭДЭЭЛЭЛ


МОНГОЛ УЛСЫН ИХ ХУРЛЫН АЛБАН МЭДЭЭЛЭЛ

**Монгол Улсын  
Ерөнхийлөгчийн  
зарлиг**

**Монгол Улсын  
Засгийн газрын  
тогтоол**

**Шүүгчийн албан тушаалаас  
чөлөөлөх тухай**

**Журам батлах тухай**



## ГАРЧИГ

### МОНГОЛ УЛСЫН ЕРӨНХИЙЛӨГЧИЙН ЗАРЛИГ

333.	Шүүгчийн албан тушаалаас чөлөөлөх тухай	Дугаар 106	1049
334.	Шүүгчийн албан тушаалаас чөлөөлөх тухай	Дугаар 107	1049

### МОНГОЛ УЛСЫН ЗАСГИЙН ГАЗРЫН ТОГТООЛ

335.	Журам батлах тухай	Дугаар 80	1050
336.	Үзэсгэлэн худалдааны тухай	Дугаар 87	1054
337.	Тогтоолын хавсралтад өөрчлөлт оруулах тухай	Дугаар 96	1055

### МОНГОЛ УЛСЫН ЕРӨНХИЙЛӨГЧИЙН ЗАРЛИГ

2018 оны 07 дугаар сарын 25-ны өдөр  
Дугаар 106  
Улаанбаатар хот

#### Шүүгчийн албан тушаалаас чөлөөлөх тухай

Монгол Улсын Ерөнхийлөгчийн тухай хуулийн 9 дүгээр зүйлийн 1, Шүүгчийн эрх зүйн байдлын тухай хуулийн 18 дугаар зүйлийн 18.1, 18.2, 24 дүгээр зүйлийн 24.6 дахь хэсгийг тус тус үндэслэн ЗАРЛИГ БОЛГОХ нь:

1. Өндөр насны тэтгэвэр тогтоолгох хүсэлтээ гаргасан шүүгч Лхамжавын Мөнхцэцэгийг Төв аймаг дахь сум дундын Иргэний хэргийн анхан шатны шүүхийн шүүгч, Ерөнхий шүүгчийн албан тушаалаас чөлөөлсүгэй.

2. Энэ зарлигийг 2018 оны 08 дугаар сарын 16-ны өдрөөс эхлэн дагаж мөрдсүгэй.

**МОНГОЛ УЛСЫН  
ЕРӨНХИЙЛӨГЧ**

**ХАЛТМААГИЙН  
БАТТУЛГА**

### МОНГОЛ УЛСЫН ЕРӨНХИЙЛӨГЧИЙН ЗАРЛИГ

2018 оны 07 дугаар сарын 25-ны өдөр  
Дугаар 107  
Улаанбаатар хот

#### Шүүгчийн албан тушаалаас чөлөөлөх тухай

Монгол Улсын Ерөнхийлөгчийн тухай хуулийн 9 дүгээр зүйлийн 1, Шүүгчийн эрх зүйн байдлын тухай хуулийн 18 дугаар зүйлийн 18.1, 18.2 дахь хэсгийг тус тус үндэслэн ЗАРЛИГ БОЛГОХ нь:



Өндөр насны тэтгэвэр авах насанд хүрсэн шүүгч Үржинбадамын Түмэнжаргалыг Сүхбаатар дүүргийн Эрүүгийн хэргийн анхан шатны шүүхийн шүүгчийн, шүүгч Ширчингийн Алтанцэцэгийг Дорнод аймаг дахь сум дундын Иргэний хэргийн анхан шатны шүүхийн шүүгчийн албан тушаалаас тус тус чөлөөлсүгэй.

**МОНГОЛ УЛСЫН  
ЕРӨНХИЙЛӨГЧ**

**ХАЛТМААГИЙН  
БАТТУЛГА**

## МОНГОЛ УЛСЫН ЗАСГИЙН ГАЗРЫН ТОГТООЛ

2018 оны 3 дугаар  
сарын 27-ны өдөр

Дугаар 80

Улаанбаатар  
хот

### Журам батлах тухай

Цэргийн албаны тухай хуулийн 30.4-т заасныг үндэслэн Монгол Улсын Засгийн газраас ТОГТООХ нь:

1. “Цэргийн албыг биеэр дүйцүүлэн хаах журам”-ыг хавсралт ёсоор баталсугай.

2. Энэхүү журмыг хэрэгжүүлж ажиллахыг Батлан хамгаалахын сайд Н.Энхболд, аймаг, нийслэлийн Засаг дарга нарт үүрэг болгосугай.

3. Энэ тогтоол гарсантай холбогдуулан “Журам батлах тухай” Засгийн газрын 2008 оны 12 дугаар сарын 3-ны өдрийн 49 дүгээр тогтоолыг хүчингүй болсонд тооцсугай.

**МОНГОЛ УЛСЫН  
ЕРӨНХИЙ САЙД**

**У.ХҮРЭЛСҮХ**

**БАТЛАН ХАМГААЛАХЫН САЙД**

**Н.ЭНХБОЛД**

Засгийн газрын 2018 оны 80 дугаар  
тогтоолын хавсралт

### ЦЭРГИЙН АЛБЫГ БИЕЭР ДҮЙЦҮҮЛЭН ХААХ ЖУРАМ

Нэг. Нийтлэг үндэслэл

1.1. Монгол Улсын иргэн (цаашид “иргэн” гэх)-ий цэргийн албыг биеэр дүйцүүлэн хаахтай холбоотой харилцааг энэхүү журмаар зохицуулна.



1.2. Монгол Улсын Үндсэн хууль, Батлан хамгаалах тухай хууль, Цэргийн албаны тухай хууль болон холбогдох бусад хууль тогтоомж нь энэхүү журмыг хэрэгжүүлэх эрх зүйн үндэслэл болно.

1.3. Аймаг, нийслэлийн Засаг дарга дараагийн жилд цэргийн дүйцүүлэх алба хаах иргэдийн тооны талаарх саналаа батлан хамгаалах асуудал эрхэлсэн төрийн захиргааны төв байгууллагад жил бүрийн 6 дугаар сард хүргүүлнэ.

1.4. Цэргийн албаны тухай хуулийн 30.5-д заасны дагуу цэргийн дүйцүүлэх алба хаах иргэдийн тооны дээд хязгаарыг батлан хамгаалах асуудал эрхэлсэн төрийн захиргааны төв байгууллагын саналыг үндэслэн Засгийн газар жил бүр батална.

1.5. Засгийн газраас тухайн жилд тогтоосон цэргийн дүйцүүлэх алба хаах иргэдийн тооны дээд хязгаарыг үндэслэн аймаг, нийслэлийн иргэдийн Төлөөлөгчдийн хурал сум, дүүрэгт цэргийн албыг биеэр дүйцүүлэн хаах иргэдийн тоог батална.

1.6. Иргэнээр цэргийн албыг биеэр дүйцүүлэн хаалгах ажлыг аймаг, нийслэлийн Засаг дарга нутаг дэвсгэрийн зарчмаар зохион байгуулна.

#### Хоёр. Иргэнийг цэргийн дүйцүүлэх албанд элсүүлэх

2.1. Иргэнийг дараах шалтгаанаар цэргийн дүйцүүлэх албанд элсүүлж болно:

2.1.1. сүм, хийдэд албан ёсоор шавилан суугаа;

2.1.2. шашин шүтлэг, ёс зүйн шалтгаанаар цэргийн жинхэнэ алба хаах боломжгүй болохыг цэрэг татлагын товчоо тодорхойлсон.

2.2. Иргэн цэргийн албыг биеэр дүйцүүлэн хаах хүсэлтээ сум, хорооны Засаг даргаар уламжлан харьяалагдах аймаг, дүүргийн цэрэг татлагын товчоонд гаргана.

2.3. Аймаг, дүүргийн Засаг дарга цэрэг татлагын товчооны саналыг үндэслэн иргэнийг цэргийн дүйцүүлэх албанд элсүүлж, алба хаалгах шийдвэрийг гаргана.

2.4. Аймаг, дүүргийн Засаг даргын Тамгын газрын Цэргийн штаб (цаашид “цэргийн штаб” гэх) иргэнтэй цэргийн дүйцүүлэх алба хаах тухай гэрээ байгуулж, биелэлтийг дүгнэнэ.

2.5. Цэргийн дүйцүүлэх алба хаах тухай гэрээнд дараах асуудлыг тусгана:



- 2.5.1. талуудын эрх, үүрэг;
- 2.5.2. талуудын хүлээх хариуцлага;
- 2.5.3. гэрээ хүчин төгөлдөр болох хугацаа;
- 2.5.4. гэрээ цуцлах нөхцөл;
- 2.5.5. гэрээнд нэмэлт, өөрчлөлт оруулах;
- 2.5.6. бусад асуудал.

2.6. Цэргийн дүйцүүлэх алба хаах тухай гэрээг 2 хувь үйлдэж, талууд тус бүр нэг хувийг хадгална.

Гурав. Цэргийн албыг биеэр дүйцүүлэн хаах

3.1. Аймаг, нийслэл, сум, дүүргийн Засаг даргын Тамгын газар иргэнээр цэргийн албыг биеэр дүйцүүлэн хаалгах ажлыг хариуцна.

3.2. Цэргийн штабын санал, аймаг, нийслэл (дүүрэг)-ийн Засаг даргын шийдвэрээр цэргийн албыг биеэр дүйцүүлэн хааж байгаа иргэн (цаашид “алба хаагч иргэн” гэх) дараах үүргийг гүйцэтгэнэ:

3.2.1. тухайн орон нутгийнхаа батлан хамгаалах үйл ажиллагаанд идэвхтэй оролцох;

3.2.2. гамшгийн аюулаас урьдчилан сэргийлэх, эрэн хайх, аврах, хор уршгийг арилгах, хойшлуулшгүй сэргээн босгох ажиллагаанд оролцох;

3.2.3. хүн, малын гоц халдварт өвчний үед тогтоосон хорио цээрийн дэглэм сахиулахад дэмжлэг үзүүлэх;

3.2.4. улсын хилийн бүс, зурваст улсын хилийн болон хил орчмын дэглэмийг сахиулахад оролцох;

3.2.5. хүмүүнлэгийн үйл ажиллагаанд туслалцаа үзүүлэх;

3.2.6. орон нутгийн хамгаалалтад оногдуулсан томилгоот үүргээ гүйцэтгэх;

3.2.7. улсын болон орон нутгийн хэмжээнд хэрэгжүүлж байгаа бүтээн байгуулалтын ажилд зохион байгуулалттай оролцох.

3.3. Алба хаагч иргэн алба хаах хугацаандаа 6 сараас доошгүй хугацаагаар энэхүү журмын 3.2-т заасан үүргийг биечлэн гүйцэтгэсэн байна.

3.4. Аймаг, нийслэл (дүүрэг)-ийн Засаг дарга алба хаагч иргэнийг хөдөлмөр хамгаалал, аюулгүй ажиллагааны хувцас, багаж хэрэгслээр хангаж, үүрэг гүйцэтгэх үеийн аюулгүй байдлыг хангуулах арга хэмжээг авч хэрэгжүүлнэ.

3.5. Алба хаагч иргэн оршин суугаа газраасаа 5-аас дээш хоногоор гадагш явах тохиолдолд аймаг, дүүргийн цэргийн штаб, эсхүл сум, хороонд бүртгүүлнэ.

3.6. Цэргийн албаны тухай хуулийн 30.2-т заасан хугацаагаар цэргийн дүйцүүлэх албыг хаасан иргэнийг аймаг, нийслэл (дүүрэг)-ийн Засаг даргын шийдвэрээр халж, цэргийн хоёрдугаар зэргийн бэлтгэл үүрэгтнээр бүртгэнэ.

3.7. Аймаг, нийслэл (дүүрэг)-ийн цэргийн штаб нь алба хаагч иргэнд алба хаах хуудас олгох, сургалтад хамрагдаж, үүрэг гүйцэтгэсэн тухай бүртгэл хөтлөх, цэргийн үүрэгтний үнэмлэхэд алба хаасан тэмдэглэлийг хийх болон цэргийн дүйцүүлэх албаны бүртгэл тооцоо, тайлан, мэдээллийн асуудлыг хариуцна.

3.8. Аймаг, нийслэл (дүүрэг)-ийн Засаг дарга оногдуулсан үүргээ биелүүлсэн алба хаагч иргэнийг холбогдох хууль тогтоомжийн дагуу шагнаж урамшуулж, дээд шатны байгууллагын шагналд тодорхойлж болно.

#### Дөрөв. Цэргийн дүйцүүлэх албаны сургалт

4.1. Цэргийн дүйцүүлэх албаны сургалтыг аймаг, нийслэл (дүүрэг)-ийн цэргийн штаб зохион байгуулж, төрийн цэргийн байгууллагуудын орон нутаг дахь анги, салбар, нэгж мэргэжлийн дэмжлэг үзүүлнэ.

4.2. Цэргийн дүйцүүлэх албаны сургалт нь цэргийн дүйцүүлэх албаны бэлтгэл, тусгай үүргийн бэлтгэл шатны сургалтаас бүрдэнэ.

4.3. Цэргийн дүйцүүлэх албаны бэлтгэл, тусгай үүргийн бэлтгэл шатны сургалтын хөтөлбөр, төлөвлөгөөг батлан хамгаалах асуудал эрхэлсэн Засгийн газрын гишүүн батална.

4.4. Аймаг, нийслэл (дүүрэг)-ийн иргэдийн Төлөөлөгчдийн Хурал тухайн жилд цэргийн дүйцүүлэх алба хаах иргэдийн тоог тогтоосон Засгийн газрын шийдвэрийг үндэслэн алба хаахтай холбоотой зардлыг тухайн төсвийн жилийн батлан хамгаалах бодлого, хууль тогтоомжийг хэрэгжүүлэхээр төлөвлөсөн зардлын хэмжээнээс хэтрүүлэхгүйгээр батална.

4.5. Цэргийн дүйцүүлэх албаны сургалтад хамрагдсан хугацааг биечлэн үүрэг гүйцэтгэсэнд тооцож, энэхүү журмын 3.3-т заасан хугацаанд оруулна.

4.6. Цэргийн дүйцүүлэх албаны сургалтыг бүсчилсэн хэлбэрээр зохион байгуулж болно.

4.7. Цэргийн албаны тухай хуулийн 30.6-д заасны дагуу цэргийн дүйцүүлэх албыг биеэр хаасанд тооцогдсон төрийн тусгай алба хаагч цэргийн нэгдүгээр зэргийн бэлтгэл үүрэгтний сургалтад хамрагдана.



4.8. Цэргийн албаны тухай хуулийн 30.7-д заасны дагуу цэргийн дүйцүүлэх албыг хаасанд тооцогдсон иргэн цэргийн хоёрдугаар зэргийн бэлтгэл үүрэгтний цэргийн анхан шатны бэлтгэл олгох сургалтад заавал хамрагдана.

#### Тав. Бусад

5.1. Аж ахуйн нэгж, байгууллагын удирдлага алба хаагч иргэнийг дуудсан хугацаанд үндсэн ажлаас нь чөлөөлж сургалтад хамрагдах, оногдуулсан үүргээ гүйцэтгэх нөхцөл боломжоор хангана.

5.2. Алба хаагч иргэнийг цэргийн дүйцүүлэх албаны сургалтад хамрагдах, энэхүү журмын 3.2-т заасан үүргийг гүйцэтгэх хугацаанд түүний эрхэлж байсан ажил, албан тушаалыг үндсэн байгууллага нь хэвээр хадгалж, дундаж цалин хөлсийг олгоно.

5.3. Зарлан дуудсан хугацаанд хүндэтгэн үзэх шалтгаангүйгээр заасан газарт ирээгүй, төлөвлөгөөт сургалтыг удаа дараа тасалсан, оногдуулсан үүргийг биелүүлэхээс зайлсхийсэн болон энэхүү журмыг зөрчсөн алба хаагч иргэнийг цэргийн дүйцүүлэх албанаас хасч, холбогдох хууль тогтоомжийн дагуу хариуцлага хүлээлгэнэ.

5.4. Цэргийн дүйцүүлэх албанаас хасагдсан иргэн цэргийн алба хаах үүргээс чөлөөлөгдөхгүй.

5.5. Цэргийн дүйцүүлэх албанд иргэнийг авах, уг албыг хаах, түүнээс хасах, халахтай холбогдсон зөрчил, маргааныг аймаг, нийслэл, сум, дүүргийн Засаг дарга энэхүү журам болон холбогдох хууль тогтоомжийн дагуу шийдвэрлэнэ.

5.6. Засаг даргын шийдвэрийг эс зөвшөөрвөл тухайн иргэн Монгол Улсын хууль тогтоомжийн дагуу маргааныг шүүхээр шийдвэрлүүлнэ.

## МОНГОЛ УЛСЫН ЗАСГИЙН ГАЗРЫН ТОГТООЛ

2018 оны 3 дугаар  
сарын 27-ны өдөр

Дугаар 87

Улаанбаатар  
хот

### Үзэсгэлэн худалдааны тухай

Засгийн газрын тухай хуулийн 30 дугаар зүйлийн 1 дэх хэсэгт заасныг үндэслэн Монгол Улсын Засгийн газраас ТОГТООХ нь:

1. Хүүхдэд зориулсан бүтээгдэхүүний дотоодын үйлдвэрлэлийг тогтвортой хөгжүүлэх, бүтээгдэхүүний борлуулалтыг дэмжих, үндэсний үйлдвэрийн чанартай бүтээгдэхүүнийг түлхүү хэрэглэх соёлыг өсвөр, залуу үед төлөвшүүлэх, төр, хувийн хэвшлийн хамтын ажиллагааг бэхжүүлэх, салбарын өрсөлдөх чадварыг дээшлүүлэх зорилгоор “Хүүхдэд



зориулав” үзэсгэлэн худалдааг Монгол Улсын Ерөнхий сайд, Хүүхдийн төлөө үндэсний зөвлөлийн даргын ивээл дор жил бүрийн 5 дугаар сарын 3 дахь долоо хоногт зохион байгуулж байхаар тогтоосугай.

2. Үзэсгэлэн худалдааг Боловсрол, соёл, шинжлэх ухаан, спортын яам, Хөдөлмөр, нийгмийн хамгааллын яам, Эрүүл мэндийн яам, Мэргэжлийн хяналтын ерөнхий газар, Шударга өрсөлдөөн, хэрэглэгчийн төлөө газартай хамтран зохион байгуулж байхыг Хүнс, хөдөө аж ахуй, хөнгөн үйлдвэрийн сайд Б.Батзориг, холбогдох сайд нар болон Нийслэлийн Засаг дарга С.Батболдод тус тус даалгаж, Монголын үндэсний худалдаа, аж үйлдвэрийн танхим, холбогдох төрийн бус байгууллага, мэргэжлийн холбоодод зөвлөсүгэй.

3. Хүүхдэд зориулсан бүтээгдэхүүний нэр төрлийг нэмэгдүүлэх, чанарыг сайжруулах, үйлдвэрлэлийн өрсөлдөх чадварыг дээшлүүлэх арга хэмжээ авч, “Хүүхдэд зориулав” үзэсгэлэн худалдаанд тогтмол оролцож байхыг үндэсний үйлдвэрлэл эрхлэгчдэд уриалсугай.

**МОНГОЛ УЛСЫН  
ЕРӨНХИЙ САЙД**

**У.ХҮРЭЛСҮХ**

**ХҮНС, ХӨДӨӨ АЖ АХУЙ, ХӨНГӨН  
ҮЙЛДВЭРИЙН САЙД**

**Б.БАТЗОРИГ**

## **МОНГОЛ УЛСЫН ЗАСГИЙН ГАЗРЫН ТОГТООЛ**

2018 оны 4 дүгээр  
сарын 4-ний өдөр

Дугаар 96

Улаанбаатар  
хот

### **Тогтоолын хавсралтад өөрчлөлт оруулах тухай**

Нийгмийн халамжийн тухай хуулийн 16.1, Ахмад настны тухай хуулийн 13.2, Хөгжлийн бэрхшээлтэй хүний эрхийн тухай хуулийн 26.4-т заасныг тус тус үндэслэн Монгол Улсын Засгийн газраас ТОГТООХ нь:

1. “Тэтгэмж, тусламж, хөнгөлөлтийн хэмжээг тогтоох тухай” Засгийн газрын 2012 оны 11 дүгээр сарын 24-ний өдрийн 136 дугаар тогтоолын хавсралтыг хавсралт ёсоор өөрчлөн баталсугай.

2. Энэ тогтоол гарсантай холбогдуулан “Тогтоолд нэмэлт, өөрчлөлт оруулах тухай” Засгийн газрын 2014 оны 10 дугаар сарын 18-ны өдрийн 343 дугаар тогтоолын 1 дүгээр зүйлийг хүчингүй болсонд тооцсугай.

**МОНГОЛ УЛСЫН  
ЕРӨНХИЙ САЙД**

**У.ХҮРЭЛСҮХ**

**ХӨДӨЛМӨР, НИЙГМИЙН  
ХАМГААЛЛЫН САЙД**

**С.ЧИНЗОРИГ**





Засгийн газрын 2018 оны 96 дугаар  
тогтоолын хавсралт

Засгийн газрын 2012 оны 136 дугаар  
тогтоолын хавсралт

**НИЙГМИЙН ХАЛАМЖИЙН САНГААС ОЛГОХ ЗАРИМ ТЭТГЭМЖ,  
АХМАД НАСТАН БОЛОН ХӨГЖЛИЙН БЭРХШЭЭЛТЭЙ ИРГЭНД  
ҮЗҮҮЛЭХ ТУСЛАМЖ, ХӨНГӨЛӨЛТИЙН ХЭМЖЭЭ**

№	Тэтгэмж, тусламж, хөнгөлөлт	Олгох хугацаа	Хэмжээ (төгрөгөөр)
1.	Байнгын асаргаа шаардлагатай 16 ба түүнээс дээш насны иргэнд олгох амьжиргааг дэмжих мөнгөн тэтгэмж	улиралд нэг удаа	60.000
2.	Гэнэтийн аюул, осол, урьдчилан төсөөлөх боломжгүй бусад шалтгаанаар гэр оронгүй, гэр орон нь цаашид амьдрах боломжгүй болсон болон амьжиргааны эх үүсвэрээ алдсан өрх, 18 нас хүрээгүй байхдаа бүтэн өнчин болсон 18-24 насны иргэн, хорих ангиас суллагдсан өөрийн гэсэн гэр оронгүй, нийгмийн халамжийн дэмжлэг, туслалцаа зайлшгүй шаардлагатай өрхийн гишүүн-иргэн, нийгмийн халамжийн дэмжлэг, туслалцаа зайлшгүй шаардлагатай, дөрөв ба түүнээс дээш 18 хүртэлх насны хүүхэдтэй, гэр оронгүй, өрх толгойлсон эцэг, эхэд олгох онцгой тохиолдлын болон амьжиргааг дэмжих мөнгөн тэтгэмж	нэг удаа	1.200.000
3.	Орон сууцны хөлс төлөх болон түлш худалдан авахад олгох мөнгөн тусламж	жилд нэг удаа	140.000
4.	Насанд хүрсэн бүрэн хараагүй, сонсголгүй, хэл ярианы бэрхшээлтэй хүний харилцаа холбооны зардалд үзүүлэх хөнгөлөлт	сар бүр	20.000
5.	Хөгжлийн бэрхшээлтэй хүүхэд болон түүний асран хамгаалагч, харгалзан дэмжигчийн цэцэрлэг, сургуульд ирж, очих унааны зардлын хөнгөлөлт	жилд нэг удаа	200.000
6.	Ажиллаж байсан аж ахуйн нэгж, байгууллага нь дампуурсан буюу татан буугдсан болон бусад шалтгаанаар харьяалах аж ахуйн нэгж, байгууллага байхгүй болсон ахмад настанд Цагаан сар: билгийн тооллын хаврын тэргүүн сарын шинийн нэгэн, Ахмадын өдөр: 10 дугаар сарын 1-ний өдрийг тохиолдуулан хүндэтгэл үзүүлэх зардлын хэмжээ	жилд 2 удаа (ахмад настан тус бүрт)	10.000

**Хаяг:**

“Төрийн мэдээлэл” эмхэтгэлийн редакц,  
Улаанбаатар-14201, Төрийн ордон 124 тоот

И-мэйл: turin\_medeel@parliament.mn

Утас: 262420

Хэвлэлийн хуудас: 0.5

Индекс: 200003